

清康熙三十年，南部个客家先民主要歇在濫濫庄（今萬丹鄉竹園村）。有一日先民行船扭魚仔，行到一大片生滿雜草叢樹个平地，趕緊徙到這片來歇，並喊人歸原鄉（今中國廣東省蕉嶺縣）邀等親戚朋友來到這開發。因為人多分做庄頭（今麟洛鄉麟蹄村）同庄尾（今麟洛鄉麟趾村）歇同耕田。在庄頭、庄尾都有天燈台，庄頭个係「上天燈」（在今鄭王公廟廟前庄坪），庄尾个係「下天燈」（在今媽祖廟廟脣），係出外做細个庄民看到天燈點著，就知愛歸屋下食夜休息欵。在庄項另外一片个新圍庄到田心仔，中間有七個高土墩，喊作「七星墩」，聽說這條龍脈係從大武山傳過來，為欵風水个需要，在小份起一間敬字亭，來擋龍祈福。有一年庄項潑大水，同這七星墩全部沖核，淨存傳說。另外，先民為保護庄項个平安，用木柵同歸庄圍項來，在北柵門做一條護城河，同兩隻石獅仔，規定每日朝晨六點正做得開門入庄。庄民輪流駐守，係有異族抑係野獸來到，歸庄人定著會共下同佢等拚命，來保護庄項个安全。

早期客家先民來到這片个時節，發現有一頭大榕樹斜斜橫等西片，就在樹頭下放一粒石頭，開基伯公也在這登基，接受庄民个唱喏供奉，庄民用籬笆同佢圍等。到欵日本時代，因為天皇要求愛改核壞習慣，就同開基伯公同籬笆過城門眾批淨開路。今下庄項个鄭王公廟（開明堂），係該時節个警察局，過來正起廟欵。過後庄民想等開基伯公，大家人掌錢同開基伯公廟起項來。每擺過節慶典，庄項个老嫩大細定著會來到這同開基伯公唱喏。也因為開基伯公係庄項

最先來到麟洛登基，故所老人家都喊佢「老伯公」。

老伯公用心保佑庄項大細事，係庄民蓄个偷生走核，來同老伯公唱喏，無幾久該偷生就會自家行歸來欸！毋過老伯公還係無辦法護等自家，民國六十六年个颱風，同佢屋下个大榕樹連根帶葉共下拔核，石碑也分風吹壞。庄民再一擺掌錢修理，同廟修好，希望老伯公繼續護等庄項个平安。

因為佢阿姆係麟洛人，故所佢還細都係在麟洛大欸！祭日个時節，佢等兄弟姐妹就會到鄭王公廟个庄坪欸搞祭，啊無就係跋到廟脣个榕樹頂高屏人尋。毋過有一件事係逐擺佢等搞祭前定著會做个事，就係行到老伯公面前，虔誠學大人儕同老伯公唱喏行禮。講也趣妙，毋管佢等在這怎樣搞怪亂搵，就係毋會受傷橫倒，老伯公在暗中保佑佢等平安會大哩。

~~ 作者為屏東縣育英國小教師 ~~